

東

華

錄

東華錄

康熙五十九

臣王先謙敬編

臣周澗蕃恭校

康熙三十六年丁丑春正月乙卯諭理藩院尙書班迪等今觀噶爾丹勢甚窮蹙天與不取坐失事機應撥兵豫備令次出兵亦分爲兩路兵各三千名此兩路兵不必豫定期約令相機而行綠旗營派兵從少馬則從多方可與滿兵同行米則照常隨行外沿邊有牛羊可買者動支正項錢糧每路各買牛羊二萬發去於軍資大有裨益至運米以馬駝爲要亦當多備須選能員往甘州甯夏採買○丙辰 上幸南苑行圍○丁巳 上還宮○戊辰副都統阿南達奏臣欽遵 皇上密旨傳諭哈密額貝杜拉達爾漢白克遣其子郭帕白克率兵於巴爾思庫爾地方擒逆賊噶爾丹之子

塞卜騰巴爾珠爾及徽特和碩齊等解至臣軍前○己巳諭原任
勇略將軍趙良棟頃尙書馬齊自甯夏回奏卿臥病不能動履用
是深軫朕懷特賜人淺鹿尾馳示存問尙其善加調攝俾夙疾頓
痊副朕眷注至意○甲戌諭大學士等觀九卿凡保舉人員非係
師友卽屬親戚是皆漢人相沿惡習天下官員朕一人何能周知
惟左右大臣是賴誠善者善而惡者惡據實敷陳則善者勸而惡
者懲矣國家事安有不理者乎況科道乃耳目之官如總兵卓策
柯彩許盛居官最爲貪鄙朕聞其軍民皆怨乃爲懲治前此科道
官曾有奏參者否爾等以朕旨宣諭儻後仍蹈前轍必不寬貸又
諭朕向會諭近侍曰溫保改行矣及巡歷山西觀通省無一好官
巡撫溫保迎至邊外觀其動作無一善狀卽保舉之員亦無一人
可用似此則人皆不可信矣○諭大學士等觀明史洪武永樂所

行之事遠邁前王我朝見行事例因之而行者甚多且明代無女
后豫政以臣陵君等事但其末季壞於宦官耳且元人譏宋明復
譏元朕並不似前人輒譏亡國也惟從公論耳今編纂明史著將
此諭增入修明史敕書內○調安布祿爲理藩院右侍郎由吏左遷○
丙子命領侍衛內大臣馬思喀爲昭武將軍往甯夏○轉阿爾拜
爲吏部左侍郎調陶岱爲吏部右侍郎轉庸愛爲戶部左侍郎以
貝和諾爲戶部右侍郎由左副都御史遷○子故左副都御史黃裴祭葬
○是月免江南淮揚徐三府州去年水災額賦

二月壬午朔欽天監豫奏日食分數 上諭大學士等日食雖人
可豫算然自古帝王皆因此而戒懼蓋所以做天變修人事也若
庸主則委諸氣數矣去年水潦地震今又日食意必陰盛所致豈
可謂無與於人事乎可諭九卿如有人事應修改者悉以奏聞○

以王毓賢爲貴州布政使

由湖北按察使遷

○癸未調哈山爲左副都御

史

由內閣學士遷

以黃茂爲內閣學士

由通政使遷

○甲申召督運左都御史

于成龍等問曰爾等何日起程于成龍奏俟效力運米官齊集同

行 上曰爾此意卽謬矣人臣宜以國事爲重勤勉自效豈可援

引朋類當此軍務緊急爾宜率先啟行餘令陸續隨往若必俟同

行豈不誤事爾自任巡撫及爲總河惟知援引私人其後運米亦

仍如此爾在河工會帶二百餘人前往迄今未用一人欲任意援

引得乎爾又云甯殺于成龍至效力人等不可不用此語豈非沽

名干譽之意乎朕已屢加嚴飭爾竟不悛何也朕於國家之事未

嘗膠執己見惟虛己以視機宜卽用兵之道亦復如是一日之中

千變萬化朕統大兵至克魯倫時亦視賊之形勢隨機而應並不

豫立己見論語云毋意毋必毋固毋我聖人之言至當不易爾惟

執己見前此運米已因待眾誤事今又欲俟眾同行此意不過欲扶助黨類令其感激耳用人之權豈人臣所得專擅朕今用人若有保舉官員亦必就中論俸升補卽素所深知者亦視其效力之處酌量用之否則俱使論俸朕乃天下之主用人之際尙不肯任意爲人臣者乃妄意自擅可乎大抵欲援助人者後必自己獲罪爾其戒之○乙酉諭吏部都察院國家設立都御史及科道官員以建白爲專責所以達下情而祛壅蔽職任至重使言官果能奉法秉公實心盡職則閭閻疾苦咸得上聞官吏貪邪皆可釐剔故廣開言路爲圖治第一要務近時言官條奏參劾章奏寥寥雖聞有人告而深切時政從實直陳者甚少此豈委任言路之初旨乎自今以後凡事關國計民生及吏治臧否但有確見卽應指陳其所言可行與否裁酌自在朝廷雖言有不當言官亦不坐罪自皇

子諸王及內外大臣官員有所爲貪虐不法並交相比附傾軋黨援理應糾舉之事務必大破情面據實指參勿得畏怯貴要瞻徇容隱卽朕躬有失亦宜進言朕決不加責其有懷挾徇私借端傾陷者朕因言察情隱微自能洞悉凡屬言官尙各精白乃心力矢忠讜以無負朕殷切責望至意○吏部遵旨將起復原任科道蘇俊等五員職名開列啟奏 上曰科道職司耳目年來並無一人陳奏故朕將見任言官嚴飭又將伊等起復言路必大開矣此後條奏內如果可行卽批准行否則俱批知道了若一概交部議覆必多更張成例之弊況朕令其陳言原欲聞軍國要務如但以浮詞細故塞責陳奏殊非朕求言本意○丁亥 上親征噶爾丹啟鑾是日師次昌平州○副都統阿南達奏自哈密擒獲厄魯特土克齊哈什哈並其妻子女共四口由驛遞解京命議政大臣議奏

尋議土克齊哈什哈係害使臣馬迪之首犯相應將土克齊哈什
哈並其子扎卜立決其妻女給馬迪之家爲奴得旨土克齊哈什
哈之子扎卜著免死亦給馬迪之家爲奴餘依議○諭大學士伊
桑阿據員外郎阿爾必特祐奏達賴喇嘛另有一疏並口奏三語
據來使尼麻唐胡土克圖云達賴喇嘛第巴會屬不得妄與他人
俟見聖上方許呈覽今朕親臨邊境著阿爾必特祐將尼麻唐胡
土克圖及卓爾磨隆堪布減其從役馳驛帶來○己丑奉差達賴
喇嘛理藩院主事保住回至莊浪奏臣於十一月二十二日到烏
斯藏奉 聖旨一一曉諭第巴第巴奏言臣庸流末品蒙 皇上
俯念達賴喇嘛優封臣爲土伯特國王臣正思仰答 皇恩焉敢
違 聖旨而附逆賊噶爾丹乎況臣之榮顯安樂皆 皇上所賜
臣苟背 皇上而向他人必當壽數夭折總之謹遵 聖旨而外

更無異詞至 上諭四事第巴回奏云 皇上聖明先知達賴喇嘛明歲出定遣兩喇嘛前來議認臣心甚喜溫春喇嘛向與達賴喇嘛同居十年令伊識認自能立辨此兩喇嘛俟至達賴喇嘛出定驗明回奏其時眾疑自釋至前者 皇上遣內齊陀音胡土克圖等召班禪胡土克圖時自達賴喇嘛及臣等皆遣使勸令赴京彼初亦願往後因來使口出恫喝過激之言遂云不往迨使臣歸後噶爾丹之使始至並不借噶爾丹巧辯卽班禪胡土克圖亦豈肯聽噶爾丹之言乎 皇上必欲班禪赴京臣焉敢違旨當啟聞達賴喇嘛必諭令班禪約定赴京之年交後去之喇嘛晉巴扎木素奏明其時作何加恩遣使總祈 睿鑒至濟隆胡土克圖於烏闌布通之役不遵 聖旨致事未成反在噶爾丹處與尙書阿喇尼交戰後慙懣噶爾丹賀之以白首帕故臣籍沒其家產遷之於

喀木地方今欲遣之與欽差赴京所在遼遠往返須兩三月恐爲
日遲久在 皇上好生之心於濟隆胡土克圖必不加誅罰臣當
委婉引來與晉巴扎木素同往以副 聖意至博碩克圖濟農與
噶爾丹結姻之事在喀爾喀厄魯特未交惡之前阿奴尙在策妄
阿喇布坦之際卽已結姻其餘臣雖不敢保而青海八台吉俱達
賴喇嘛弟子但願爲 皇上效力並無二心可保其不背 皇上
也 皇上仁愛天下黎民有如赤子噶爾丹之女已嫁博碩克圖
濟農之子免送京師不至夫婦離散此臣所禱而求之者也我土
伯特人不諳禮法止以無知獲罪臣未嘗知而故犯也卽有無知
之罪乞欽差奏明 皇上伏祈寬宥仍賜溫旨等語遂於十二月
初十日以覆奏本章交臣起程而歸臣今至莊浪先將第巴奏答
情由具本由驛遞馳奏外其第巴覆奏並賀滅噶爾丹表使人囊

素禁柰臣親身隨後帶來京喇嘛晉巴扎木素等奏言前者奉旨謂臣等二人素識達賴喇嘛著驗明回奏而第巴又謂達賴喇嘛前身見在是實爾等可看明回奏竊思 皇上遣委之事尙未明晰如何可棄之而去是以臣公議將給達賴喇嘛敕書賞賚諸物不會頒給俟達賴喇嘛出定時驗明再歸復命故特留此 上報聞且以示議政諸臣○癸巳諭議政大臣等前旣陣斬噶爾丹之妻阿奴喀屯今又生擒其子賊之本根已斬噶爾丹雖各處偷生其年老邁能延幾何其子爲我所獲是乃天之所賜也凡用兵之道要在乘機噶爾丹窮迫已極宜乘此際速行剿滅斷不可緩朕今親臨甯夏相度機宜調遣軍士賊聞之必魂魄俱喪其部屬亦必張皇而別部蒙古聞朕親臨甯夏各欲建功扼噶爾丹而圖之彼若不自盡亦必爲人擒獻克成大事正在此舉又諭朕親歷

行間塞外情形知之甚悉自古以來所謂難以用兵者是也其地不毛間或無水至瀚海等砂磧地方運糧尤苦而雨水之際樵爨頗難區畫不周豈可妄動朕今親臨甯夏凡有可用兵之地必詳察行道水草全備馬駝糧糗等物然後起程稍有可疑雖諸臣勸行朕亦不允也○丁酉諭大臣等著傳旨與貝勒松阿喇布今噶爾丹已將成擒其子塞卜騰巴爾珠爾已被獲近聞噶爾丹在薩克薩特呼里克之南格隔特哈朗古特地方眾僅四五百人又青海諸台吉俱降見有人來請安朕今親臨甯夏著將右翼三旗貝勒公台吉等兵共派二千以備調遣爾蒙古裝載橐駝監管收放素能習練可豫備以待俟朕到甯夏應從何路前進俟旨行著侍衛綽克圖前去傳諭左翼王貝勒貝子公台吉毋以朕往甯夏問道前來請安爾等有能效力者往貝勒松阿喇布處伺候以聽指

揮○戊戌

上駐蹕大同詔祭所過帝王陵寢先賢墳墓名山大

川○辛丑以高緝齋爲湖北按察使

由山東登萊道遷

○壬寅奉差達賴

喇嘛理藩院主事保住回至

御營以第巴疏陳奏 上以示議

政大臣等曰第巴之疏爾等意以爲何如議政大臣等奏曰第巴

差尼麻唐胡士克圖回奏今尙未到應俟伊到日再行議奏 上

曰朕意與爾等之意不同朕閱經史塞外蒙古多與中國抗衡溯

自漢唐宋至明歷代俱被其害而克宣威蒙古並令歸心如我朝

者未之有也夫兵者凶器聖人不得已而用之譬之人身瘡瘍方

用鍼灸若肌膚無恙而妄尋苦楚可乎治天下之道亦然亂則聲

討治則撫綏理之自然也自古以來好勤遠略者國家元氣罔不

虧損是以朕意惟以不生事爲貴達賴喇嘛蒙古等尊之如佛第

巴者卽達賴喇嘛理事之人噶爾丹叛逆皆第巴之故因朕遣主

事保住嚴頒諭旨第巴悚懼悉遵朕諭奏辭甚恭自陳乞憐畏罪
矢誓此亦敬謹之至矣至達賴喇嘛身故朕已悉知今第巴云遣
尼麻唐胡土克圖前來代彼密陳其情想尼麻唐胡土克圖到後
必奏明達賴喇嘛已經身故懇朕爲伊等掩飾達賴喇嘛與我朝
交往六十餘年並未有隙第巴旣如此奏懇事亦可行卽此可以
寬宥其罪允其所請第巴必感恩而眾蒙古亦歡悅矣諸臣奏曰
聖算至神非臣等所及○丁未 上駐蹕李家溝先是鄉導官
言李家溝無水及行至河曲縣界見渠中有水問之鄉人云水至
兩三日矣 上旣駐蹕水忽從山溝湧出頃刻長至二三尺而城
河人馬資用不竭鄉人聚觀咸敬異云此地向無大水今因 聖
主臨幸所以山川效靈百神助順從此可爲永遠之利矣○戊申
上駐蹕輦鄆村是日途次山嶺險峻從人輜重難行 上親督

近侍協助俟其過盡然後啟行先是尚書馬齊設驛派程奏輦駟村僅二井水少從人皆以乏水爲慮上甫至行宮南山之下見有水痕眾趨視之地中各處湧泉頃刻流溢眾咸歡呼曰昨言水少水卽驟至今言水少甘泉又復湧出如此神異誠天之所以佑聖主也○諭山西巡撫倭倫朕撫御區宇念切民依故不憚勤勞親歷邊境惟孳孳以靖寇安民爲急茲簡約扈從人員從大同一路緣邊地方進指甯夏因徧察閭閻生聚及土壤肥瘠收穫豐歉之狀邊民生計維艱朕心深用軫惻雖一切供御之物纖毫不以累民而乘輿臨幸宜特敷庥澤以示恩恤除大同額賦已有諭旨豁免外其經過岢嵐州河曲縣保德州所屬地方並各衛所康熙三十六年應徵地丁銀米通予蠲免爾卽行令該管官吏張示徧諭務俾窮鄉僻壤均霑實惠以稱朕撫育黎民至意○己酉

諭山西巡撫倭倫聞爾居官好家計亦貧特賜爾御用貂服一襲
朕理政事日以民生爲念爾能以朕如保赤子之心保民卽所以
報朕也爾其識之

三月癸丑 皇子允禮生○甲寅 上駐蹕卞家水口撫遠大將

軍伯費揚古奏厄魯特多爾濟等挈妻子駝馬來降○乙卯副都
統阿南達遣護軍校阿奇納等解噶爾丹之子塞卜騰巴爾珠爾
至 上命侍衛引之入見塞卜騰巴爾珠爾伏地不敢仰視 上

問曰爾父噶爾丹窮困已極降乎否耶塞卜騰巴爾珠爾惶恐奏
曰臣穉子無知想 皇上天威自必降也問以他事皆戰慄不能
對隨遣送塞卜騰巴爾珠爾等至京師命 皇太子傳諭諸王內
大臣及八旗大小官員兵民人等閱視交理藩院拘禁○丙辰

上渡屈野河駐蹕○賜哈密額貝杜拉達爾漢白克及伊子郭帕

白克等金幣衣服○丁巳議政大臣等議覆哈密額貝杜拉達爾漢白克奏臣遣子郭帕白克擒噶爾丹子塞卜騰巴爾珠爾必爲四部厄魯特所仇其中左翼之怨尤深臣哈密微弱所尤懼者策妄阿喇布坦也請敕理藩院移文青海諸台吉及策妄阿喇布坦諭以哈密旣已歸誠勿得侵擾應如所請從之○廣東巡撫高承爵丁憂命回旗守制○昭武將軍馬思喀奏原任勇略將軍趙良棟病卒 上召隨駕總兵官白斌等諭曰趙良棟偉男子也行間著有勞績但性躁心窄每與人不合有時奏事朕前亦言語粗率朕保全功臣始終容之後有疾朕嘗遣賜藥食彼所奏無不准行此特欲有疾者喜悅而速愈耳今聞奄逝朕殊爲惻然聞趙良棟存日與總兵官王化行不相能朕至甯夏務爲其妻子區處使之安生斷不使受害於其仇也○厄魯特達喇什等率眾來降○辛

酉 上駐蹕榆林○壬戌 上出邊駐蹕他喇布拉克○諭議政大臣等凡調遣外藩兵馬之事俱已交大將軍伯費揚古如皆請旨而行則有倉卒軍機必致遲誤嗣後俱聽大將軍便宜調遣○飭沿邊衛堡如州縣例備積貯○甲子阿南達奏據噶爾賚多爾濟遣其寨桑阿好來報云我舊屬多爾濟阿兒達爾哈什哈等六口於去年十二月內來言我等貧不能存去歲八月辭噶爾丹欲往舊主噶爾賚多爾濟處噶爾丹云汝去吾不汝阻卽在吾左右不能養汝汝到彼可語噶爾賚多爾濟曰汝姐阿奴在日言我必以女鍾齊海嫁噶爾賚多爾濟我已允之矣今汝姐已歿此女或娶或不娶唯汝裁之其言如是我非欲娶此女但以其爲噶爾丹屬我屬下人之言故今相告耳爲此奏聞 上以示議政諸臣○戊辰恭奏 皇太后書曰本月十六日駐營鄂爾多斯之境同噶

拉克水泊 皇太后慈旨以臣生日賜金銀茶壺二執齋到臣懼
忭拜受仰惟 母后於二千里之外常爲思念寄以如許之物臣
非不知縈懷之切也去年出塞自春中之月至夏之中自秋杪之
月至冬之末今復春將盡矣遠在原野不克侍左右而問安者亦
止爲此一噶爾丹耳今賊子就擒其下離散乘此之時不可不盡
去其根株臣至甯夏相機會而行爲此謝恩謹奏○甯夏總兵官
王化行迎 駕並奏請 皇上行圍花馬池以觀軍容 上曰朕
行軍二次深悉軍情今噶爾丹未滅馬匹關繫緊要甯夏兵來花
馬池往來須七八日馬必疲乏夫獵細事耳以擒獲噶爾丹爲急
今罷獵而休養馬匹以獵噶爾丹何如爾速遣人傳諭所屬官兵
勿來花馬池俟朕至甯夏閒暇之日閱爾軍容○庚午尼麻唐胡
土克圖等至行在以第巴奏章密奏 上隨將彼奏章及所獻達

賴喇嘛之像於原封之外面同伊等加封押以鈐記而諭之曰朕數年來久知達賴喇嘛已故若達賴喇嘛尙存則僧巴陳布胡土克圖噶爾丹西勒圖齊七克達賴堪布濟隆胡土克圖等斷不如此妄行喀爾喀厄魯特亦不至破壞故朕降旨切責之今第巴輸誠吐實密以奏朕朕亦爲之密藏也○辛未 上駐蹕花馬池○諭領侍衛內大臣索額圖內大臣明珠大學士伊桑阿前者朕以達賴喇嘛身故已久第巴隱之附和噶爾丹行事故差保住嚴詰第巴豫料第巴必自陳達賴喇嘛已故乞爲彼隱諱向亦曾與爾等言之今彼差尼麻唐胡土克圖至果密奏達賴喇嘛身故已十六年再生之小達賴喇嘛已十五年乞皇上暫隱之勿聞於眾與朕昔語爾等之言略無少異又諭保住尙有未完之事著與尼麻唐胡土克圖同往○壬申理藩院奏尼麻唐胡土克圖羅卜臧凱

尊囊素等齋到達賴汗慶賀擊敗噶爾丹一疏及第巴二疏並所
獻禮物請旨 上以第巴二疏命議政大臣等議奏尋議覆第巴
奏達賴喇嘛避忌坐禪丑年出定今尼麻唐胡土克圖密奏已奉
聖諭應不議外又奏言蒙召班禪胡土克圖今當遵旨問明班
禪胡土克圖或卽令赴京或另日前往定議再奏應令將班禪胡
土克圖赴京年月徐徐定議具奏又言請嗣後拘解濟隆胡土克
圖伏乞 皇上畱其身命但濟隆胡土克圖係達賴喇嘛遣和喀
爾喀厄魯特之人乃竟不知勸解反導噶爾丹入境與我軍交戰
情罪可惡前已有旨不誅濟隆胡土克圖然務必解送來京又言
噶爾丹女或令離異與否伏候 聖裁噶爾丹抗 君逆賊其女
斷不得畱於青海務令解送來京又言臣以無知或有違 聖意
之事伏乞寬宥今當謹遵 聖旨竭力自效祈俯念達賴喇嘛錫

以溫綸應如所請遣使頒諭從之○癸酉 上駐蹕興武營敕振

武將軍孫思克速自甘州進勦○丙子 上自橫城渡河○諭大

學士等趙良棟乃爲國宣力建功之人不必以其躁急性褊爲意

今已身故來朝經過其門欲遣皇長子及部院諸臣往視致祭一

次陳福曾爲國效力適至此地亦致祭一次○丁丑 上駐蹕甯

夏察卹昭莫多翁金陣亡弁兵○庚辰 上閱綠旗兵率諸皇子

及侍衛等射賜總兵官以下及官兵等宴遣近侍以 御用之物

均賜戰士○撫遠大將軍伯費揚古奏報出使噶爾丹之員外郎

博什希筆帖式闡壽同噶爾丹使人喇木扎卜丹濟拉使人羅卜

臧等並格壘沽英及其妻子十三口俱到邊哨先以博什希奏摺

驛送進呈博什希等奏摺云正月二十九日距噶爾丹所居薩克

薩特呼里克以內二日之程抵台吉吳思塔處止臣等母前次日

格壘沽英往告噶爾丹二月初二日噶爾丹使綽什希巴圖爾來先領 敕書十四日綽什希巴圖爾來請相見次日日落時噶爾丹至野外坐巖上令臣等遠坐使二人夾臣膝坐兩旁不令近前迭相傳語噶爾丹曰我聞 皇上沛此恩綸不勝欣藉自今 聖上凡有所諭惟遵 旨以行而已我之言已在奏內我之意已語我使人使人到日當口奏也語畢乘馬而去丹濟拉遣其下常達里來言蒙 聖恩口授格壘沽英以諭臣之 旨奈噶爾丹疑臣不復差遣臣是以將中心欲奏之言俱告之格壘沽英矣今不便請欽差相見是日綽什希巴圖爾率拉木扎卜來云昨派格壘沽英爲使彼挈其妻子潛逃是以另派拉木扎卜代之奏疏及一應言語俱在使人臣博什希等於二十五日自薩克薩特呼里克起程途遇自京前去之察哈代言我與吳爾占扎卜之母達爾扎哈

什哈之妻子同行至中途被劫將吳爾占扎卜之母等劫去我奉
敕書步行已授噶爾丹吳爾占扎卜之母等遇噶爾丹屬下阿
爾拜家人送噶爾丹處已交還吳爾占扎卜矣其達爾扎哈什哈
之妻子家人亦交吳爾占扎卜暫養又途遇自京前去之曼濟言
我於正月初二日見噶爾丹授以 敕書噶爾丹問 聖上之兵
如何我對曰不知其數兵甚多並言丹巴哈什哈察罕什達爾哈
什哈已授職爲內大臣在京沙克珠木亦爲內大臣隨 駕而行
眾厄魯特俱加愛養有離散之人各處尋覓 皇上親視配合噶
爾丹默然無言一日噶爾丹至諾顏格隆家丹濟拉阿巴吳爾占
扎卜俱在坐飲酒吳爾占扎卜謂噶爾丹曰我輩自去年冬以薩
克薩特呼里克獸多故居於此今獸已駭散矣如往降 聖上則
往近之如不降當另圖一策首鼠兩端而待斃乎且爾欲扶法門

之教致四厄魯特七旗喀爾喀已略盡矣爾國已破父子夫妻離散究無補於法門之教反造罪孽而已噶爾丹默無一言所有人丁共三百餘其他俱各捕獵遠去馬甚少騰甚疫視噶爾丹情狀大約不降丹濟拉有欲降之意又吳爾占扎卜之母歸謂噶爾丹彼國大兵多富而且盛 中華皇帝乃活佛也敵人母子遣使完聚爾等從前亦曾聞有是 否其餘非常之舉言之不盡阿旺丹津言奉 旨差我使於伊拉古克三胡土克圖故不往噶爾丹所居地方又不知伊拉古克三胡土克圖所在是以與曼濟同歸於是帶諸人同行三月初九日至哈密圖布拉克地方遇格壘沽英言我見噶爾丹述 中華皇帝口傳之旨云爾以追喀爾喀之故而來犯我爾之理曲我之理直故天祐我而擊敗爾爾雖爲我敵而朕不以擊敗爾爲喜爾今無所往矣此天下之君無大於朕者如

倚朕爲生必得生路爾果來歸朕則寬爾之罪寵榮養育爾雖欲不降朕豈於爾漫然而已乎宣諭畢噶爾丹默然無語問我曰

中華皇帝大略何如我對曰爾降則不奪爾汗號待以寵榮使眾人咸得生路丹濟拉引我於無人之地問曰 中華皇帝亦道及我乎我言 中華皇帝不時向我言爾丹濟拉貌偉材長丹濟拉言我會謂噶爾丹當降已一二次而不聽吾言其狀亦疑我爾試言之如降則我爲使而往視丹濟拉情狀有欲降之意我在噶爾丹處六日亦自竭力勸諭而噶爾丹實無降意仍遣我同使我思噶爾丹一無實意而我又充使來誑可乎是以攜我妻子六十餘口馬百餘匹橐駝四十餘頭來歸 聖上及到什魯特地方伊拉古克三胡土克圖親率百餘人猝然掩至我身及妻三子一幼孫共十三口帶馬三匹橐駝一頭而出我媳及其餘人馬駝什物俱

被劫去我右肩背下洞中烏槍傷臣今帶格墨沽英及其子吳巴什察哈代曼濟等分作二起星馳前來爲此謹奏 上諭議政大

臣等博什希等已歸至邊哨先具本奏言格墨沽英攜其妻子來降噶爾丹亦遣使來俟伊等到時問明噶爾丹或降或他去方可進兵今速檄孫思克博濟止其進兵俟事明檄知而行○遣理藩院主事保住署主事薩哈連齋敕往諭第巴偕尼麻唐胡土克圖同行敕曰朕臨御天下統理萬邦溥播仁恩懲創亂逆其誠心恭順者必加獎賚焉爾布特達阿卜地前與噶爾丹同謀凡事必徇厄魯特而行濟隆胡土克圖敗乃公事爾堅畱不遣其時朕謂達賴喇嘛若在斷不至此故嚴詰責茲爾奏言 聖上嚴旨下頒心甚憂懼今惟欽遵 聖諭隨力報效儻軫念達賴喇嘛乞降溫綸諄切奏請爾既知過引罪朕豈不念達賴喇嘛通使修禮歷有年

所乎且朕若不加眷恤爾土伯特國豈得安其生耶其濟隆胡土克圖乃達賴喇嘛所特遣以結喀爾喀厄魯特之好者也被竟不使喀爾喀厄魯特和好反導厄魯特入我境內與我軍交戰情罪甚爲可惡務必擒解彼之身命朕俱准爾所請寬而宥之其班禪胡土克圖應於何年月日來朝爾從容定期具奏至噶爾丹與朕抗我師大克之兇惡逆賊情罪重大其女斷不許留於青海爾必解來若不解送則罪歸於爾矣如噶爾丹果悔罪來歸其時另有處分今尼麻唐胡土克圖至將爾奏請之言俱已密奏朕前朕亦密有諭旨朕之素懷惟願率土之人咸躋雍和共享安樂斷不容摘發陰私傾人家國嗣後爾宜益加恭順勿違朕旨朕盡貸爾前罪嘉惠如初如此則爾土人民大蒙利賴爾之榮貴可獲長享矣爲此特遣正使理藩院主事保住副使署主事薩哈連以降敕例

賜幣六端保住等請訓 上諭爾等到後待第巴勿如從前舉動
宜加和婉授敕畢爾等仍前作禮進幣但謂第巴曰 皇上統領
大兵已臨甯夏因前事四款爾皆遵旨 皇上大悅故不進兵至
爾尼麻唐胡土克圖來密陳達賴喇嘛出定之事 上皆知之矣
亦有密旨諭尼麻唐胡土克圖矣此事除 皇上與尼麻唐胡土
克圖卓爾磨隆堪布及御前侍衛拉錫四人外餘皆不知也自此
以後 皇上一應諭旨爾惟敬奉而行則 皇上愈眷顧爾矣況
達賴喇嘛講信修禮已歷六十年有不念及者乎且謂爾務使諦
穆胡土克圖與我等同赴京 上將使之誦經如服水土則令駐
錫如不相宜亦卽遣還較尼麻唐胡土克圖更加優待再口宣旨
云噶爾丹之子及其屬下大臣以至部伍 皇上俱收而納之矣
至爾等前往可於扎什巴圖爾台吉處取諳地里之鄉導而去既

到西方歸來之時可於第巴處取驛馬乘歸上項事情爾等備文用部印帶往至喇嘛津巴扎木素等爾等即攜之而歸

閏三月辛巳朔日有食之○先是尼麻唐胡土克圖以第巴語密奏達賴喇嘛沒已十六年小達賴喇嘛生今年十五因欲俟相合年歲始聞之天朝皇帝及眾施主故定於今年十月二十五日方出定放參若於他處俱令以達賴喇嘛出定相告未嘗明悉其故上以第巴既輸誠密奏亦暫爲祕之欲俟十月初旬宣示內外四十九旗及喀爾喀諸處至是奉使策妄阿喇布坦處司務英古歸奏云臣齋部文至策妄阿喇布坦所彼大喜即遵旨領兵來勦噶爾丹行二十程至薩克薩特呼里克有達賴喇嘛使人達爾濟厄木齊來言達賴喇嘛身故已十有六年小達賴喇嘛已十五歲爾等各居其地不得興兵策妄阿喇布坦遂按兵而退臣知其

不能復行亦還達賴喇嘛已故西北諸人皆已聞之又副都統阿南達奏噶爾賚多爾濟遣人來告達賴喇嘛第巴遣人致誓於我云諭青海諸首領俱於正月二十八日在察罕托落海地方會盟繕修器械可令爾屬下人亦繕修器械務如期必到盟會之地我以向不與彼盟會是以不往 上命議政大臣等集議尋議覆第巴無故令青海諸台吉繕修器械又約從來未與盟會之噶爾賚多爾濟其意叵測且策妄阿喇布坦親領兵往勦噶爾丹之時第巴遣人撤回以此觀之第巴仍黨噶爾丹而誑我其迹顯然恐第巴以彼所居遼遠謂我不知其詭計應令所司詳列此情令尼麻唐胡土克圖及主事保住等詢明第巴來奏從之○乙酉召回奉使第巴主事保住等至 上諭之曰朕遣爾等傳致第巴敕文及口諭俱無庸更改但以第巴致書於噶爾賚多爾濟及差人阻止

策妄阿喇布坦之兵又英古歸奏達賴喇嘛身故之事俱已傳播是以追回爾等問之尼麻唐又第巴所獻達賴喇嘛像及奏章朕於原封上在伊等前加封今著此地諸喇嘛同尼麻唐拆視乃泥塑達賴喇嘛之像其頭已斷此項情由爾等可宣問第巴並將轉生之小達賴喇嘛看明回奏達賴喇嘛身故策妄阿喇布坦諸人已悉聞之可將此項始末凡途中所遇之人皆曉諭之○以劉標爲雲南布政使由湖南按察使遷○己丑 上召四川陝西總督吳赫西安副都統阿蘭台甯夏總兵官王化行原任總兵官王潮海馮德昌及副將道員等諭曰朕往者未嘗臨邊不獲目覩邊地之苦今巡行至此視沿邊地方土瘠民貧但兵丁甚精銳黃河以西榆林一帶比他處實勝然兵卽良如不善撫綏而困苦之則兵雖良無用也善撫綏者但將其應得錢糧如數支給卽是養兵之道若不

知撫恤雖多給國帑兵丁斷不能霑實惠爾等武臣多出身行伍一旦居官頓忘在昔爲兵之苦而剋剋糧餉於心何忍今雖末員當計日後漸臻大任可不存心愛惜兵丁乎朕又聞營中虛懸兵數冒食錢糧各處皆然陝西尤甚且或聞朕來見招丁壯以補足原額者亦有之總之督撫提鎮當盡心體恤下寮免其餽獻則下寮不至貧苦下寮既不貧苦則斷不剋兵以自肥矣爾大小官員各有俸祿養廉衣食並無所缺儻扣剋虛冒卽罹於罪關係利害匪輕卽今總兵官柯彩練兵甚精前亦曾經效力後以操守不好致人疾怨朕撤彼回京大都武臣之中勇敢果毅出力效用者多操守潔清者少有慎於履任之初而渝於後者趙良棟操守頗好恢復雲南秋毫無犯在武臣中可謂良將矣爾等居官俱當法之但不可效其驕矜耳又聞總兵官師帝寶操守甚清雖身後而軍

士尙愛戴之凡有功而居官好者朕皆擢用矣其一時聲名甚佳
日久改節者皆年齒漸增貪貨賄計身家而坐此失也爾等其遵
此訓旨通行曉諭○庚寅康親王傑書薨于祭建墳立碑謚曰良
○辛卯理藩院侍郎滿丕奏厄魯特扎木素等來降言我等三月
初三日在薩克薩特呼里克時忽一日晚似有礮聲霧瀾瀚海噶
爾丹營中擾亂俱言滿洲兵近逼矣遂遷至哈薩克圖哈喇阿濟
爾罕地方正擾亂之時我等逃出又丹濟拉離噶爾丹另遷於什
爾哈戈地方噶爾丹遣人兩次召之丹濟拉不至又遣人於杜哈
爾阿喇布坦處杜哈爾阿喇布坦奪取其馬畜所去之人步行而
歸又噶爾丹聞西路有阿南達兵防守根敦戴青滿兵已圍取洪
郭羅口不知所往在阿爾臺四圍遊行欲往阿爾臺之陽則山險
而無野獸欲往額黑阿喇爾則畏杜哈爾阿喇布坦據此將扎木

素同格壘沽英曼濟及其妻子並馬駝什物俱交驛站遞送至歸化城發副都統阿迪安插奏至 上命示議政諸臣○壬辰奉差噶爾丹博什希及其使人喇木扎卜至齋到噶爾丹奏言奉到敕書及使人格壘沽英口傳諭旨不勝懼怵但屬下人爲大兵所敗四處雜散正欲遣格壘沽英前往密奏而彼忽逃亡是以遣喇木扎卜前往口奏喇木扎卜奏曰噶爾丹言 聖旨云汝不能自活則率眾來降我居無廬出無騎食無糧我屬下丹津阿喇布坦杜爾伯特之車陵滾占之子車陵多爾濟俱不能自活散去捕獸不及招集伊等諮問其意俟集問之後再行另奏緣 皇上有恤臣之旨是以臣屬下人歸投 皇上者甚多伏乞發還臣所並乞 聖上加恩賜於失所之人以活其命 上曰汝欲歸乎抑留此地乎喇木扎卜奏曰臣有心告請而來今臣之妻子俱在此地臣他

無所往 上諭內大臣等大兵起行之前當遣人招撫噶爾丹丹濟拉此差不必遣本朝之人前與塞卜騰巴爾珠爾同擒者有噶爾丹乳母之子丹濟扎卜再撥願往之厄魯特人齎敕而往一面遣使一面進兵達賴喇嘛身故已十有六年矣第巴指達賴喇嘛之語以誑噶爾丹彼信其誑自言爲達賴喇嘛之教而恣肆橫行以此等事明開敕內照樣刊刻多印付丹濟扎卜等徧行傳示並遣使諭策妄阿喇布坦令乘此機會亦興兵勦滅之敕諭噶爾丹曰去冬命爾早降則予以富貴給以貨產眷顧煦育之卽爾屬厄魯特之眾亦各得見其妻子遂其生業故遣使偕格壘沽英往宣敕旨今使者喇木扎卜至覽爾所奏謂未明朕旨觀爾辭意一無眞實而請給還來奔之厄魯特豈惟厄魯特之眾雖爾子塞卜騰巴爾珠爾及爾乳母俱已被獲今皆豢養與徽特和碩齊同居爾

若來歸卽令爾子與爾相聚否則爾有何功遂還爾厄魯特之眾
爾欲歸降應及早來若不歸順徒遷延時日何益況達賴喇嘛已
故朕亦知之曾嚴飭第巴第巴又遣尼麻唐胡土克圖上表來賀
捷且奏稱達賴喇嘛已沒十六年其轉生之胡必爾汗年已十五
歲則爾之指稱達賴喇嘛以爲護法欺誑眾人者已顯露矣爾所
欲逃匿之地厄魯特來降者多朕已悉知卽使遁入洪郭羅險固
之地諸路皆可進剿爾困迫若此尙何力拒守耶今已無所歸矣
今歲卽不擒汝來歲當復發兵追討必不中輟汝其詳審之故遣
丹濟扎卜察罕代舒魯等齎旨特諭敕諭丹濟拉曰朕爲天下元
后善善惡惡乃不易之至理也去歲遣格壘沽英等歸敕內開載
爾名復使格壘沽英傳諭今格壘沽英等來爾之辭意皆已備陳
爾今能致噶爾丹來降必當封爲貝勒畀以殊榮如不能致爾一

身歸順亦能不失富貴況爾以下之人先降者皆釋其罪顯榮優養爾應悉聞已往之過概不介意爾曾密奏若有臣罪臣請投降故特專賜敕旨盡宥前罪敕到其速降朕爲大君豈改成命特諭敕諭厄魯特之台吉寨桑哈什哈並其眾人曰朕無分中外皆欲其各安生理樂育昇平至於誅戮征伐原非本懷爾厄魯特等附從噶爾丹所在侵掠雖有所得於人而已之祖父戰死妻孥被掠者亦云眾矣今所餘之人不被創受傷者甚鮮死亡之餘其存幾何因從噶爾丹之故以致窮迫無歸困苦已極屢頒諭旨命噶爾丹前來歸順則凡爾厄魯特之眾朕必俱加養育使之各得其所乃噶爾丹怙惡不悛並不以爾眾爲念不思歸順他日兵臨則爾眾難免俘戮故特諭厄魯特之眾爾若能各攜族屬妻子來降者朕皆養育使得其所前所降者已加養養爾眾亦當聞之矣特諭

○遣侍郎常綬等齎敕諭策妄阿喇布坦○遣厄魯特恩克歸招撫滾占之妻奴渾達喇及其子車陵多爾濟又命理藩院行文諭之曰爾之恩克自哈密城擒解前來今遣往爾所爾等如欲降者卽前來斷不可與噶爾丹和好毋以爾夫曾與我軍交鋒被創爲懼朕非欲得爾之人眾也若欲奔策妄阿喇布坦可卽前往朕不治罪若欲奔青海則我軍見在西路朕賜爾文持往令彼放行○癸巳命厄魯特降人格壘沽英爲散秩大臣其子吳巴什爲一等侍衛○甲午甯夏紳衿兵民人等聞 駕起行齊集行宮前叩懇留數日以慰羣情 上曰朕欲掃蕩寇氛以安黎庶特幸甯夏經理軍務駐蹕十有餘日曩者南巡凡所巡幸之處未有駐蹕至三日者且邊地磽瘠民生艱苦朕甚憫之朕扈從人眾恐多留一日卽滋百姓一日之擾朕已定十五日起行爾等誠懇之意朕已悉

知又向者曾欲使禁軍駐防此地恐民間居處狹隘已命將房舍查明給還原主爾等卽回故居可也紳衿兵民等懽呼叩謝奏請御製聖訓勒之貞珉光垂奕世上日朕巡幸原欲安民今製

文頒賜則百姓運碑雇匠轉致煩苦不必行紳衿兵民等復懇請上諭大學士等議奏大學士伊桑阿等奏曰人民叩請 皇上

親製聖訓勒石垂久洵爲盛事應如所請從之 御製碑文曰諭

甯夏文武官員兵民人等朕體天育物日以治安爲念雖身在宮庭而心恆周四海頃因指畫軍務不憚勤勞遠洩甯夏無非爲蕩滌寇氛綏乂生靈計也緣邊千餘里土壤磽瘠惟甯夏洪流灌輸諸渠環布巡覽所至甚愜朕懷夫農桑者衣食之本積貯者殷阜之原爾官吏宜董勸父老子弟三時力田以盡地利比屋勤殖以裕蓋藏縱使歲偶不登亦可無憂匱乏若夫秦風健勇自昔爲然

其在朔方尤勝他郡爾等或職居將領或籍隸戎行尙各厲清銳
以效干城禦侮之用斯國家有厚賴焉至於忠信慈惠服官之良
軌孝弟齒讓生人之大經法紀不可不明禮教不可不肅勿以地
處邊陲而不治以經術勿以習尙氣力而不澤以詩書總期上率
下從庶幾馴臻雅化茲乘輿返蹕距靈朔雖遠而晷念塞垣如在
几席爾等誠能敬體朕言將吏協恭兵民咸理生聚日益厚風俗
日益醇則疆宇實有大裨朕心亦用深慰慎勿視爲具文孤朝廷
倦倦牘導之意欽哉○諭大學士伊桑阿著將所議兩路進兵追
勦噶爾丹撥置馬匹糧米及設站之事俱查奏朕將覆覈之大學
士等查呈 御覽 上曰各項事務議論區畫俱已詳盡今噶爾
丹無所逃矣噶爾丹或降或自盡否必爲我所擒朕將親至船站
視兵馬起行暫駐彼地聽其聲息儻有朕當親行之事則行之○

諭昭武將軍馬思喀著都統侯巴渾德齊世將軍薩布素都統兼前鋒統領碩鼐護軍統領嵩祝總兵官王化行俱爲參贊既與大將軍伯費揚古會將軍馬思喀亦爲參贊至總兵官王化行去歲出征噶爾丹之役見其人材矯健隊伍整齊尤著勞績大將軍伯費揚古來亦奏其功緣旗總兵官向無授爲參贊之例著王化行於此役軍中爲參贊賜孔雀翎○乙未 上自甯夏城往白塔是日啟行○丙申諭大學士伊桑阿陝西巡撫黨愛按察使納壘俱已衰老今用兵之時伊等不能勝任俱著解任黨愛速赴行在山西按察使巴錫著授爲陝西巡撫其納壘員缺著以郎中鄂海升補○庚子予故理藩院侍郎西拉祭葬○癸卯撫遠大將軍伯費揚古以去歲未能勦滅噶爾丹請解大將軍任 上不允○福建巡撫卞永譽丁父憂命回旗守制○予故靖海將軍靖海侯太子

少保施琅祭葬加祭二次諡襄壯○子故原任雲南貴州總督卞三元祭葬諡恪敏○丙午 上駐蹕黃河西岸白塔○己酉 上駐蹕黃河西船站親視八旗前鋒黑龍江兵起程遇馬駝中稍有疲蹇者皆以內廐馬駝易之

夏四月庚戌朔 上駐蹕狼居胥山 駕出行宮親臨大路閱視八旗槍手綠旗兵起行○壬子命留領侍衛內大臣索額圖於船站管理水路設站事務○甲寅諭大學士伊桑阿四川總兵官馬子雲欲率回子襲噶爾丹之後回子生性無義曾三擒其主以獻噶爾丹其兵豈可用乎本朝之兵所向無敵若有事時已不可勝用矣安用外國之兵古來用外國兵鮮有善者宋用金兵滅遼復用元兵滅金金既滅元遂滅宋此其明驗也初噶爾丹併吞吐魯番葉爾欽薩馬爾漢哈薩克等十餘部落本朝並不之問當厄魯

特與喀爾喀戰時本朝若助厄魯特今如何能破噶爾丹乎噶爾丹既克喀爾喀直侵內地朕始領兵勦滅前定海總兵官藍理曾請率所屬藤牌兵進勦沙漠地寒冰凍與南方迥別藤牌兵雖強夏尙可用自八月以至三月豈但交戰卽藤牌亦不能執此皆人地不相宜所謂紙上談兵者也馬子雲粗鄙不識大義可曉示之○諭議政大臣等今諸事俱畢惟噶爾丹僅存各處逃竄大兵前進按勦不久旋師路必由此當逐站置米師回乏糧者以米給之來降之厄魯特青海來朝之台吉等俱由此來米糧馬匹已留於此則駐此而理事者尤爲緊要朕本欲駐此親理其事但天下事大是以回鑾著留領侍衛內大臣索額圖並都統阿席坦噶爾瑪王永譽護軍統領蘇曷副都統巴賽等於此○丙辰 上登舟起行○工部右侍郎李柟丁母憂命回籍守制○庚申以戴納爲山

西按察使

由御史選

○命直隸各省選拔文行兼優之士府學起送二

名州縣學各起送

蒙古各起送二名漢軍起送一名爲

拔貢生赴國子監○甲子

御舟泊布古圖撫遠大將軍伯費揚

古奏康熙三十六年四月初九日臣等至薩奇爾巴爾哈孫地方

厄魯特丹濟拉等遣齊奇爾寨桑等九人來告曰閏三月十三日

噶爾丹至阿察阿穆塔台地方飲藥自盡丹濟拉諾顏格隆丹濟

拉之婿拉思綸攜噶爾丹屍骸及噶爾丹之女鍾齊海共率三百

戶來歸丹濟拉因馬疲瘠又無糧糗是以住於巴雅恩都爾地方

候旨其吳爾占扎卜色棱阿巴塔爾阿喇爾拜額爾德尼吳爾扎

忒喇嘛等帶二百戶投策妄阿喇布坦而去額爾德尼寨桑吳思

塔台吉博羅齊寨桑和碩齊車林奔寨桑等帶二百戶投丹津鄂

木布而去除將奇齊爾寨桑等九人馳送行在外臣等於十三日

統領大軍前往丹濟拉所住巴雅恩都爾地方卽押丹濟拉等前來如其心懷反覆卽行勦滅 上諭今噶爾丹已死其屬下三百餘戶帶噶爾丹之屍噶爾丹之女來降著大將軍伯費揚古精選帶去之兵往覓丹濟拉所在押護前來餘兵遣回黑龍江兵路遠亦遣回伯費揚古所統之兵旣足阿南達一路兵亦令撤回徧檄商南多爾濟杜思噶爾及眾札薩克俱令知悉于成龍等所運之米亦令停止○議政大臣等奏噶爾丹乃狡猾巨寇獲罪於天

皇上不憚勤勞三次出討噶爾丹勢盡途窮今果自盡悉符 聖算臣等請行慶賀禮 上曰噶爾丹之死乃 天之所助宜先謝

天遂設香案於行宮外 上率文武官員行拜 天禮畢 上

還行宮文武官員行慶賀禮是日甘霖大沛○丁卯丹濟拉使人奇齊爾寨桑至奏曰噶爾丹閏二月十三日身死卽於是日焚其

屍攜噶爾丹之女鍾齊海及諾顏格隆拉思綸程貝臧布尼爾巴
噶卜楚陳奔自阿察阿穆塔台起程宿十站到巴雅恩都爾候旨
而行見在右翼壯丁四百共人口千餘每丁各有馬一匹共橐駝
一百五十頭此外並無他物 上曰據奏噶爾丹屍已焚著大將
軍驛遞其骨速來齊奇爾寨桑應令乘驛發至大將軍軍前或先
遣彼卽赴丹濟拉所或同大兵帶往大將軍身臨邊地聽其酌行
賜厄魯特齊奇爾寨桑蟒袍袷帶○己巳以宮夢仁爲福建巡撫
由通政使遷○辛未議政大臣等議奏塞卜騰巴爾珠爾乃獲罪於天
逆賊之子今噶爾丹旣死其子當卽梟示傳首於四十九旗喀爾
喀眾扎薩克噶爾丹骸骨到日粉骨揚灰其徹特和碩齊乃塞卜
騰巴爾珠爾乳父亦應斬首免其梟示得旨俟朕回鑾後再奏○
甲戌厄魯特降人諾爾布察桑等以勦滅噶爾丹奏請行慶賀禮

上諭往者噶爾丹以追逐喀爾喀爲名直入我扎薩克烏闡布通地方故朕命裕親王及皇長子率師往勦之噶爾丹大敗使濟隆胡土克圖往復陳說自今以往不敢再犯邊陲噶爾丹頭頂威靈佛以誓此爾眾所共聞者也嗣後無故過土喇潛處巴顏烏闡地方掠我臣服之納木扎爾陀音故朕親率六師聲罪致討然猶不忍遂加誅滅再四遣使諭以和好而噶爾丹怙惡不悛朕故整師進勦噶爾丹不能當我軍威驚潰奔逃遇我西路大兵奮擊大敗之此皆噶爾丹違天背盟以致禍患及身國隨以亡朕但思埽除殘暴拯救羣生誠惻懇求符天理故大軍所向無水之方靈泉竊沸不毛之地庶草蕃滋山川效靈百神顯佑聞噶爾丹所至之處必有烈風暴雨災異頻逢驚聞我軍之來寢食俱廢反復思維無計能逃窮急仰藥而亡由此觀之天可違乎其助順惡逆亦

顯然矣夫與朕爲敵者惟噶爾丹而已與眾何涉不惟噶爾丹在日爾等降必加恩撫恤卽今噶爾丹已死凡有降者朕亦如爾輩恩育豈忍異視耶然噶爾丹之滅朕之大小官員當奏請慶賀爾輩素皆受恩於噶爾丹之人不必奏請○諭大學士伊桑阿前山西巡撫倭倫以去歲山西數州縣歉收今米價甚貴奏聞頃噶爾丹殲滅天下悉已無事惟愛養兵民爲要務山西米價騰貴民生困苦朕聞之中懷軫惻扈從前來大臣侍衛官員執事人自船站坐來之船見有水手若至湖灘河朔後將此船逆流牽挽回至甯夏甚難前亦曾諭總督吳赫就此船將湖灘河朔積貯米或五十石或再加多量行裝載交巡撫倭倫派賢能屬員轉運順流而下至保德州比時價減糶於民大有裨益著學士黃茂率同部院司官二員前往侍郎安布祿畱此監發米石○乙亥革侍郎席密圖

職以採買牛羊事畢不趨赴行在也○丙子厄魯特車陵台吉率部眾來降○丁丑厄魯特滾布察罕等率屬來降○以李光地爲

工部右侍郎

原任兵部右侍郎

五月壬午副都統阿南達奏臣等率兵於四月十八日至巴爾庫爾哨探者報云丹濟拉已起行不在屯紮之處乃問逃來之杜喇爾據稱我未出逃之前丹濟拉與眾議時皆言我等或暫棲巴爾庫爾否則往投 聖上丹濟拉言我等不便久居巴爾庫爾當乘人未覺之先急從鳴斯渡瀚海將鳴爾丹骸骨及鍾齊海送至達賴喇嘛所吾心盡矣是以臣等至彼營地視之行迹似向布克達額冷哈巴爾罕而去臣等急向瀚海南竟趣鳴斯口以禦之十九日自巴爾庫爾起行矣 上命議政大臣等議尋議覆前者大將軍伯費揚古遣散秩大臣丹巴哈什哈至丹濟拉所令其來降已

作蒙古書用印發去矣又齊奇爾寨桑來奏曰丹濟拉言爾往投
聖上此處四圍皆我仇人如久住巴雅恩都爾儻人知之未必
不來侵犯故我瀚海四圍處處畱蹤如我離巴雅恩都爾而他往
我必埋書於此而去爾往奏 聖上歸來我若不在此則覓得我
埋之書便知我所在矣曾以此言密語我人無知者又問厄魯特
降人格壘沽英言噶爾丹身存之日曾集眾寨桑商其所往一無
可去而止今丹濟拉以寡弱之眾游行數月欲往達賴喇嘛所料
其必無是事此正合奇齊爾寨桑處處畱蹤之言逃人杜喇爾不
知故言欲向達賴喇嘛而去應將目下大將軍伯費揚古疏鈔發
阿南達等知悉從之○諭議政大臣等著將戴罪圖功之趙山思
格色遣一人於丹津鄂木布遣一人於丹津阿拉布坦副以蒙古
將領筆帖式曉諭噶爾丹已死招撫其眾伊等若招得丹津阿拉

布坦丹津鄂木布卽與俱來如事不成或未至其地半途而回著
大將軍卽於軍前正法○丙戌予故刑部尙書圖訥祭葬諡文恪
○庚寅撫遠大將軍伯費揚古奏都統碩鼐送到厄魯特吳蘭等
三人稟稱我等係伊拉古克三胡土克圖下逃出之人去年九月
伊拉古克三胡土克圖已離噶爾丹採稻爲食至伊克敖拉等處
度冬今年三月自納默黑圖雅蘇圖向西游牧其下人口共有三
百許向薩克薩特呼里克而去是以臣等率領大兵照常前進一
面撥兵交昭武將軍馬思喀同參贊都統侯巴渾德都統齊世都
統前鋒統領碩鼐都統石文英往追伊拉古克三胡土克圖務期
勦滅卽遣降人吳蘭在馬思喀軍中引路 上以示議政大臣○
辛卯諭議政大臣等溫保居官甚劣苛虐百姓至於已極前乃自
奏其居官甚善萬民頌美欲爲樹碑由今觀之沿途眾庶無不願

食其肉而讎怨之者況溫保不比他人彼嘗爲學士朕愛惜斯民之意豈不知之甘度居官亦最庸劣今蒲州民變逃入山口若輩如能素勤撫恤百姓豈遂抗匿至此巡撫倭倫往彼招撫尙不順從欲將溫保甘度拏赴彼處正法然後用兵今思其服官汙濁賸削小民殊爲可恨此等貪官不加誅戮衆不知儆著議政大臣部院堂官會同議奏尋議覆溫保甘度革職嚴拏赴京交與刑部從之○癸巳以朱都納爲督捕侍郎由內閣學士遷○乙未 上還京師○丙申諭大學士及九卿等朕前巡行直隸山東江南浙江見地方人民皆各安生業大小官員恐朕不時臨幸咸兢兢守法奉職以爲他省類皆如此頃由大同歷山西陝西邊境以至甯夏觀山陝民生甚是艱難交納錢糧其火耗有每兩加至二三錢不等者前曾面問總督吳赫據言西安府距省甚近收耗尙輕若沿邊所在

地方火耗不免加重矣至於山西特一小省聞科派竟至百萬民何以堪科道官因朕已經訪聞始行參劾並未有言於未發覺之前者亦屬何益又諭塞外情形不可臆度必身歷其境乃有確見昔朕欲親征噶爾丹眾皆勸阻惟伯費揚古言其當討後兩次出師皆朕獨斷若非朕親統大軍追襲噶爾丹使少畱餘息彼必復聚難以遽滅矣明時爲恢復河套議論紛紜至大臣夏言曾銑受戮自朕觀之此地無甚關繫若控馭蒙古有道則河套雖爲所據安能爲患控馭無道則何地不可爲亂蒙古游行之地防之不可勝防專言收復河套亦何益乎至行師之道調軍轉餉必一人兼綜其成事乃易濟前西路進兵時將軍博霽孫思克等專管軍務不與輓運專責地方巡撫等官轉餉迨後糧餉稽遲兵丁困餒致有道殲頃朕自白塔至船站猶見有遺骸皆遺鄉導沿途掩埋朕

統大兵由中路進時多方籌畫催督糧餉比及旋師無一人受餒且支給西路之兵俱獲全還又令沿途各站多貯米糧雖隨營貿易之人皆不乏食此次甯夏之行料理糧餉悉有次第然後進兵所以直至回軍供應皆足無或稍誤以此觀之兵食兩事斷宜一手區畫此後儻遇行師當永以爲法朕又觀塞外運糧最難昔唐宋及明嘉靖時皆用兵西陲不知當日作何轉運之法朕此次甯夏之行不用車輛所需駝馬贏驢悉自京城發往恐有不敷復給公帑採買豫備一切什物皆由官運畧不累民○丁酉諭吏部國家舉行大計原期黜幽陟明使大法小廉以爲乂安民生之本所關甚重比年以來督撫等官視爲具文每將微員細事填註塞責至眞正貪酷官員有害地方者反多瞻徇庇護不行糾參以致吏治不清民生莫遂重負朕愛養元元之意殊可痛恨今當舉行大

典各督撫等官應洗心滌慮力改前轍矢公矢慎整肅官方務期

薦舉一人俾眾皆知勸糾劾一人俾眾皆知儆儻仍敢苟且因循

徇私溺職國法具存必不輕恕○以傅臘塔爲刑部尙書

由左都御史遷

努赫爲禮部右侍郎

由左副都御史遷

○戊戌諭吏部等衙門朕頃以狡

寇噶爾丹未滅調度軍務親蒞塞外因念切民依巡歷邊境所至

咨訪目擊山西陝西緣邊一路地接沙磧難事耕耘人多穴居類

鮮恒業其土壤磽瘠固已生計維艱而地方遼遠疾苦無由上聞

大小官吏不能子愛小民更恣橫索遂使里井日漸虛耗比年用

兵以來一應軍需芻糗俱動支正項錢糧儲峙供應從不取辦閩

閩乃各府州縣官員借端私徵重收火耗督撫布政使等官又不

仰體朝廷恤民至意糾參貪污禁革加派反多瞻徇曲庇又或該

督撫庸懦懈弛因而筆帖式及衙門人役無所忌憚擅作奸弊以

致民生滋覺朕心深切軫惻今外寇已經蕩平惟以綏乂地方拊循百姓爲急務山陝兩省關係緊要應作何撫恤休養著九卿詹事科道詳悉以聞尋議覆山陝里井艱難皆緣督撫有司不能仰體 聖上軫恤黎民之意橫徵私派之所致也應請敕下山陝督撫務期洗心滌慮正己率屬嚴飭所屬官員屏絕苞苴嚴禁私徵重耗其貪污虐民者立行糾參至筆帖式衙門人役擅作奸弊滋擾地方者亦必嚴加懲處凡有不利於民應革事宜督撫卽爲確查革除或遇水旱災傷當卽奏聞如督撫仍前因循徇庇屬員不能撫綏百姓將督撫革職從重治罪從之○辛丑以席爾達爲左都御史由禮部左侍郎遷布泰爲內閣學士由內閣侍讀學士遷○刑部尙書翁叔元以病乞休命原品休致○壬寅以吳璵爲刑部尙書張鵬翮爲左都御史由兵部右侍郎遷○諭大學士等今噶爾丹已平天下無事惟

以察吏安民爲要務然官吏之賢否民生之休戚所關朕一人端居深宮何能徧知此番巡行山陝或先聞其有聲名而居官實善者有之此皆上下相隔不能通達之故也雖古聖君以知人爲難朕豈料溫保行事一至於此往者江浙山東等處地方官以朕不時巡幸各加勉勵操守皆優山陝官員則劣甚朕恨貪污之吏更過於噶爾丹此後激清吏治如圖平噶爾丹則善矣○給事中鄭煜奏平定噶爾丹慶賀大禮頒詔款項 上曰凡頒詔敕皆人主之事非人臣所宜言自古不以頻赦爲善政者以其便於惡人而無益於善人也鄭煜妄以詔款陳奏念係言官特從寬宥著大學士嚴飭之○癸卯禮部奏平定噶爾丹武功告成應遣官告祭並加上 徽號命史館諸臣編輯平定北寇方畧昭示無極 上曰喀爾喀厄魯特原皆納貢之國因其交相不睦屢諭和好乃仍搆

魯致起兵爭噶爾丹曾破回子中之薩馬拉罕布哈爾哈薩克布魯特葉爾欽哈思哈爾賽拉木吐魯番哈密諸國其所攻取降服者一千二百餘城乃習於戰鬪之國也喀爾喀焉能抵敵是以七旗數十萬眾一歲之中喪亡畧盡喀爾喀之汗諾顏台吉等知朕豢養蒙古夙有厚恩悉皆款塞來歸其時若不允其歸附恩養得所必皆淪入於厄魯特則噶爾丹之勢力不言可知矣允其內附而恩養之噶爾丹必假此釁端與我朝構難凡此情事皆經熟籌受納喀爾喀非漫然而爲之也噶爾丹假索取喀爾喀爲名遂犯我邊境尙書阿喇尼率蒙古兵逆戰於烏爾會之地我師大北噶爾丹乘勢遂直抵烏闌布通距京師未及七百里斯時諸王大臣及國家諳悉軍務之人不在行間者少矣適朕躬以違和還京左翼軍雖能勝敵而右翼軍不能制勝大臣而下以至軍士陣亡被

創者甚眾噶爾丹亦自知其無濟歸路遭罹瘟疫得還科卜多者
不過數千人耳當是時卽豫知其勢雖大損必復稱兵報怨六年
以來烏闌布通之役時塵朕懷因是訓練軍旅咨訪形勢正經理
武備之時噶爾丹果復舉兵寇掠喀爾喀之納木扎爾陀音於克
魯倫之地朕思此賊不可以尋常寇盜視之詔武臣三品以上咸
陳滅賊方畧會同詳議舉朝皆以爲難其言賊當討滅者不過數
人朕以爲此賊斷難亟圖遂昭宣大義祭告於 天地 宗廟
社稷之靈克成厥勳儻事或未成則受喀爾喀之內附致厄魯特
之兵爭糜中國之脂膏事朔荒之邊塞窮兵黷武其名恐未能免
矣今我師所至 上天佑助無水之地靈泉湧出不毛之地庶草
蕃蕪事悉稱意者此皆國家之福將士之勞所致也今西北永遠
甯謐其不至蒙咎卽幸矣自今以往務益殫誠勵精始終如一治

安之後愈求治安其祭告諸典禮俱依議行徽號不必上○乙巳

以齊式武爲山西布政使

由郎中遷

○丙午轉努赫爲禮部左侍郎以

楊舒爲禮部右侍郎

由內閣學士遷

○丁未以嚴曾架爲兵部右侍郎

由副都御史遷

六月己酉朔以戴都里爲左副都御史

由盛京戶部理事官遷

○庚戌諸王

貝勒貝子公滿漢文武官員及遠近士民赴暢春園恭請 皇上

允受神聖文武大德廣運尊號

上諭朕御極三十六年自始至

終孜孜不倦而吏治尙未激清民生尙未豐裕士卒尙未休息風

俗尙未醇樸且旱潦災異亦復相仍方今外寇旣靖正宜休息生

養徒加尊號何益於治朕蕩平噶爾丹機宜未嘗有失苟天下共

能知之朕願足矣崇上尊號不必行毋復再奏○命盛京禮部侍

郎阿山以禮部侍郎銜管翰林院掌院學士事○裁江南京口水

師總兵官改設副將屬京口將軍轄標下三營裁右營歸併中左
二營○甲寅禮部奏 聖駕親征朔漠所過名山及勦賊戰地請

磨崖勒石俾塞外億萬載臣民咸知今日豐功峻烈爲開闢所未
有從之○國子監奏請將 親征朔漠一切訏謨勝算纂集大綱

同祭告 先師文勒碑國學更將碑文摹捐頒發天下學宮從之

○以喀拜爲內閣學士由通政使遷○丁巳以哈山爲盛京禮部侍郎

由左副都御史遷○辛酉諭刑部尙書傅臘塔爾部事關人命甚屬緊要

自圖納任刑部以來勤勉供職事甚修舉屬員至今稱善今乃簡

爾以任此職綏色亦素稱賢能司官如邁塗則辦事庸常所賴者

惟汝二人○諭大學士等河工事重朕常畱心察訪聞董安國於

河工不親巡歷凡事俱委馮佑馮佑爲人朕深知之向以諳練河

務爲靳輔所任用靳輔役之如奴隸今董安國目爲正人信任倚

用不知若輩惟解營私決不肯秉公盡職也○癸亥以劉元慧噶

禮俱爲左副都御史

劉元慧由宗人府府丞噶禮由通政使遷

○甲子副都統阿南達

奏臣等遣台吉雲楚木西安前鋒署總尉吳通保遊擊楊奇張當

知等率兵五百名前往堵噶斯口臣等因俟散秩大臣丹巴聲息

緩行至色爾騰地方遇噶爾賈多爾濟使人俄濟通問於策妄阿

喇布坦而還言丹濟拉已遣人往策妄阿喇布坦處通好見住吉

木色地方待其使回觀此丹濟拉往附策妄阿喇布坦是實臣等

在此俟丹濟拉無益欲撤噶斯口兵起行而回 上諭丹濟拉往

投策妄阿喇布坦是實著阿南達等軍俱回阿南達量率兵馬暫

住布隆吉爾等處探聽聲息再檄阿南達遣人同噶爾賈多爾濟

之人哈密回子之人往策妄阿喇布坦處宣諭朕旨再將阿南達

疏及遣使之故檄內大臣索額圖大將軍伯費揚古將軍馬思喀

等從鄂爾多斯驛路而回侍郎滿丕亦著回來著侍郎安布祿率察哈爾兵每旗十名將領二員至滿丕所居駐紮將軍舒恕亦著回來今大兵既撤前所帶四月糧又令備兩月糧米多餘畱令于成龍等同大兵運至船站收囤鄂爾多斯達賴布喇克地方交鄂爾多斯王貝勒等撥兵看守支給畱駐船站之大臣台吉等官兵○己巳予故原任勇略將軍雲南貴州總督兼一等精奇尼哈番趙良棟祭葬加祭一次謚襄忠○戊寅山西巡撫倭倫奏請建

萬壽龍亭恭勒 聖諭永戴 皇仁 上諭大學士等何事建立

龍亭若果善民自感頌其建立龍亭著停止至大同田薄民窮倭倫奏稱大同地方飼馬萬匹全不費民力自朕觀之前此大同養馬不過六千未始不用民力朕因民勞苦故將康熙三十六年錢糧盡免朕凡事俱務實行不尙虛譽爾等可曉示之○先是撫遠

大將軍伯費揚古奏散秩大臣丹巴等至巴雅恩都爾並無丹濟
拉蹤迹因遣阿玉什等齎臣所發丹濟拉書往追丹濟拉又將軍
馬思喀等咨言伊拉古克三胡土克圖自所宿磨海圖郭爾已去
七八日不能追及得旨前者遣內大臣策妄諾爾布散秩大臣巴
當阿兩路往擒伊拉古克三胡土克圖緣兵馬糧餉扣數發去是
以指地疾往限日立歸此馬思喀所灼知也伯費揚古遣馬思喀
時所發官兵太多是以重滯不能追及伊拉古克三胡土克圖昨
丹木巴哈什哈歸朕亦知其勢斷不能獲伊拉古克三胡土克圖
曾諭議政諸臣今果如朕所諭矣著檄索額圖阿南達知之至是
伯費揚古會同馬思喀奏散秩大臣丹巴等直至楚庫爾戈必並
無丹濟拉蹤迹大兵直至磨海圖郭爾不能追及伊拉古克三胡
土克圖目下大兵似可卽回但趙山思格色差往招撫丹津阿拉

布坦丹津鄂木布已將四十日矣今軍食尙足且察罕諾爾等爾處水草又佳是以臣等共商將官兵移進察罕諾爾住三十日以養馬畜而候趙山等聲息此閒若招致厄魯特則收之押護而來若二十日內無聲息則臣等率領官兵起程而回至達爾漢親王諾內喀爾喀親王善巴及貝勒公台吉等因無事故皆遣回前以察哈爾八旗官兵馬疲奉旨留於守米之地伊等請效力前來今無事亦遣回報聞

東華錄

康熙六十

臣王先謙敬編

臣周澗蕃恭校

秋七月辛巳理藩院奏臣等會同大學士阿蘭泰尙書馬齊遵旨
往旃檀寺召集默爾根綽爾濟各寺喇嘛一一取供查丹巴色
爾濟阿齊圖格隆巴咱爾喇木扎木巴俱係大喇嘛奉 皇上差
遣往達賴喇嘛處乃知其已故而謂之尙在通同第巴誑奏殊爲
可惡應將丹巴色爾濟阿齊圖格隆巴咱爾喇木扎木巴擬絞監
候秋後處決家產人口入官以丹巴色爾濟巴咱爾喇木扎木巴
之徒交默爾根綽爾濟安置京城各寺廟以阿齊圖格隆之徒交
歸化城彭蘇克喇嘛安置彼處寺廟得旨丹巴色爾濟從寬免死
革去住持大喇嘛鈔沒家產單身發往盛京任棲一廟阿齊圖格

隆各處差遣效力從寬免死並鈔沒革去住持大喇嘛准住其本廟巴咱爾喇木扎木巴亦從寬免死並鈔沒革去大喇嘛餘如議
○壬午少詹事高士奇奏請終養命加詹事銜回籍終養○癸未大學士等擬尊上 皇太后壽康顯甯徽號 上命滿大學士等往奏 皇太后 皇太后不允大學士等回奏 上復令奏請奉 皇太后旨皇帝懋建宏勳予不勝忻悅際此昌期予心慰矣尊加徽號向雖有例並非斷不可已者著停止我心始安大學士等回奏 上命大學士等集議○甲申大學士等復奏請 皇太后奉 皇太后旨皇帝既不受尊號這加徽號不必行大學士等議奏 皇太后不受徽號懿旨已經三頒相應謹遵 懿旨 上曰三次力請 皇太后既不允應謹遵 懿旨○丙戌先是撫遠大將軍伯費揚古奏臣感冒傷寒更兼體弱不能率兵前行得旨伯

費揚古不必候大兵著卽歸馬思喀既見嵩祝後率大兵養馬徐
行而歸尋諭撫遠大將軍伯費揚古覽奏朕衷不勝隱惻今噶爾
丹旣死諸事俱畢兵亦當撤所遣丹濟拉吳爾占扎卜伊拉克
三胡土克圖數人所往何處有確聞之時發檄取之當卽解來目
下爾所到察罕諾爾距邊哨有幾許遠朕卽撥醫人食物給驛遣
往朕此諭到速將爾病勢如何來奏至是疏奏謝恩並言臣於六
月二十三日以官兵交馬思喀臣仗 皇上福澤病已少愈身命
可以無礙但腰骹猶痛不能起立養病前行量力圖歸瞻仰 天
顏可冀臣病全痊報聞○戊子以康良親王傑書子椿泰襲和碩
康親王○壬辰朝鮮遣使來賀○封朝鮮國王李焯子昫爲世子
○甲午 上諭殿試讀卷諸臣曰作文者無不論理然徒能言而
不能行亦奚益哉朕觀性理一書大指止一誠字人可不以誠自

勉乎○乙未以朔漠平定遣官告祭郊廟社稷陵寢及

先師孔子○丙申太和殿告成○卹贈從征昭莫多前鋒侍衛夸

達世職○丁酉上御太和殿羣臣上表行慶賀禮加恩中外赦

殊死以下○加撫遠大將軍伯費揚古一等公西路出征參贊以

下官各給拖沙喇哈番襲一次○辛丑吏部遵諭議覆皇上親

統六師駐蹕甯夏甘肅巡撫郭洪係封疆大臣離甯夏止一二程

竟不赴行在朝見今聖駕還宮始塞責具奏請安殊屬不合應

革職拏問得旨郭洪著革職餘依議尋刑部問擬枷責命發黑龍

江當差○免從征八旗兵所借帑金○癸卯命吏部尙書庫勒納

等賚外藩四十九旗○丁未上巡幸塞外啟鑾○以喀拜爲甘

肅巡撫

由內閣學士遷

八月丙辰以壽甯爲內閣學士

由內閣侍讀學士遷

○轉綬色爲刑部左侍

郎以覺羅三寶爲刑部右侍郎

由內閣學士遷

○卹贈死事長史多禪世

職○己未諭大學士阿蘭泰山陝兩省最爲要地以後文職缺人俱令奏聞朕酌量選用○副都統阿南達奏臣差護軍校阿奇納自色爾騰前去令從布隆吉爾重整所設驛站將留貯之米運至長馬爾地方六月二十六日阿奇納至噶爾賚多爾濟所居西欣木地方驛站噶爾賚多爾濟親率二三十人至阿奇納所奪馬駝殺從僕二人執阿奇納行三日至布隆吉爾方遣回臣卽率兵追噶爾賚多爾濟至布隆吉爾哈喇烏蘇地方又據坐塘撥什庫邊代報稱噶爾賚多爾濟逃去時其屬下人經過本驛奪五驛之馬乘駝而去又因丹濟拉來降先遣齊奇爾寨桑前來噶爾賚多爾濟遇之亦執之而行留於耆爾渾台地方而去臣因丹濟拉來恐彼恰遇噶爾賚多爾濟故遣夸蘭大衛赫納等選滿洲綠旗兵共

四百名以追噶爾賚多爾濟迎丹濟拉至噶爾賚多爾濟屬下見
在招降人內有應取來者與我軍一齊帶至肅州交孫思克博霽
解往招降吳能巴圖爾等共一百九口輝特台吉羅卜臧屬人共
八百口其喇嘛阿喇木扎木巴阿喇木班共三百口交台吉俄木
布額爾德尼等由邊外徐行致之賀蘭山等處候旨 上諭噶爾
賚多爾濟乃誠心降附之人去歲使人來重加恩賜斷不逃遁但
伊等以耕爲業今棄其田禾忽然逃去必有不得已之情著理藩
院行文將軍孫思克博霽等務必詳察明白具奏驛站關繫重大
應行文將軍孫思克等將被劫驛站作速添補馬匹不得誤事至
策妄阿喇布坦處亦應將噶爾賚多爾濟逃去之事發敕諭之諭
策妄阿喇布坦曰噶爾賚多爾濟率其屬眾誠心來降安插耕種
今忽留其下人盡棄田苗逃去其去必有不得已之情朕於噶爾

賈多爾濟畧無責備之意伊係鄂齊爾圖車臣汗之孫儻往爾地
欲居於彼可收之好加撫養如欲歸來卽行遣回朕於此降旨令
收噶爾賈多爾濟遺留人等特諭○乙丑以噶禮爲內閣學士由左
副都御史遷○丙寅以內閣侍讀學士扎賴爲內閣學士尋調爲左副
都御史○乙亥 上駐蹕巴圖舍里賜喀喇沁翁牛特喀爾喀王
以下至台吉等銀幣

九月辛巳浙江巡撫線一信奏原任溫處道陳丹赤永嘉知縣馬
璉當耿逆叛時殉難請立祠致祀從之○癸未副都統阿南達奏
據回子額貝杜拉達爾漢白克報稱厄魯特丹濟拉率家屬七十
九人來降於六月十五日至哈密城求請面 聖隨遣長子郭帕
白克送丹濟拉已於六月二十八日啟行 上以丹濟拉向係名
族授爲散秩大臣其子多爾濟塞卜騰授一等侍衛俱安插張家

口外編入察哈爾旗分佐領其屬下人酌可用者披甲給以錢糧
○調王澤宏爲吏部右侍郎轉王封濬爲禮部左侍郎以韓葵爲
禮部右侍郎由內閣學士遷○甲申 上駐蹕汗特木爾達巴漢地方厄
魯特台吉丹濟拉至 御營 上命之進見大學士阿蘭泰及郎
中阿爾法引丹濟拉入 上獨坐氈帷內遠屏左右並令阿蘭泰
阿爾法出獨留丹濟拉語良久丹濟拉出驚謂諸大臣曰我乃叛
逆罪人窮困始來歸命乃 皇上畧不致疑盡屏左右召我入見
且蒙 恩授我顯爵乃知 聖主至勇至仁如此令我誠心感戴
永不敢有異心矣 上隨召阿蘭泰入諭曰爾等偕丹濟拉入者
蓋以防不測也爾等所見雖是朕思凡人無不可以誠感丹濟拉
雖來降其心不無疑畏朕推誠如此伊必感激喜出望外斷無妄
動之事且伊儻妄動數百人朕亦不以爲意況一人乎朕令爾等

俱出不留也。惟內者欲使丹濟拉之不疑也。○壬辰 上諭內務

府總管海喇孫等膳房人花喇額楚哈哈珠子德住茶房人雅頭

伊等私在皇太子處行走甚屬悖亂。著將花喇德住雅頭處死。額

楚交與伊父英赫紫圍禁家中。○甲午 上還京師。○己亥以李

錄予爲內閣學士。由少詹事遷○轉李光地爲工部左侍郎。以熊一瀟

爲工部右侍郎。由左副都御史遷○乙巳發廩賑黑龍江濱河被水居民

○以席爾達爲兵部尙書。哈雅爾圖爲左都御史。由兵部侍郎遷○贈鎮

平將軍湖廣提督徐治都太子少保。予祭葬諡襄毅。○丙午以錢

三錫爲左副都御史。由宗人府府丞遷○丁未理藩院奏請將巴圖爾額

爾克濟農所有壯丁編爲佐領。另爲一扎薩克鑄給印信。明年令

移至烏喇忒附近之地居住。上曰若將巴圖爾額爾克濟農移

住近地則沿邊別部蒙古甚多。豈可盡移乎。蒙古事在治之。得其

道不在地之遠近著停其遷移其編佐領爲扎薩克給印信俱依
議

冬十月己酉諭宗人府禮部國家樂育人材振興文教將使海內
英雋之士靡不蒸蒸蔚起矧宗室子弟系託天潢豈無卓越之姿
足稱令器允宜甄陶獎勵俾克有成考諸前史以公族應制舉入
仕者代不乏人今屬籍所載日益繁衍除已授爵秩人員外閒散
子姪素無職業誠恐進取之途未闢致嚮學之意漸墮嗣後入旗
宗室子弟有能力學屬文奮志科目應令與滿洲諸生一體應試
編號取中如此則賦質英異者咸服習於詩書而學業成就者不
阻抑於仕進凡屬宗支人人得以自效而於朕興賢睦族之至意
亦用是以允愜焉爾等衙門卽遵諭行○飭諭督撫提鎮慎軍政
舉劾○哈密額貝杜拉達爾漢白克奏臣旣擒塞卜騰巴爾珠爾

並噶爾丹屬下諸人厄魯特必不悅臣而哈密又素弱用是危懼
伏乞庇而安之且臣所畏者策妄阿喇布坦也祈 皇上降敕使
勿害臣給臣敕印俾有恃以無恐以保我疆土且使葉爾欽吐魯
番等聞之必共欣羨各思嚮往更懇移回子屯於肅州凡朝覲往
來俱自肅州乘驛使臣地聲息得時至 聖上之前下議政大臣
等議尋議額貝杜拉誠心向化殊爲可嘉應議敘以示鼓勵額貝
杜拉授爲一等部長伊子郭帕白克白奇白克授二等部長分編
旗隊並令伊子郭帕白克率一百人往紮肅州應給額貝杜拉管
轄哈密國印遣理藩院郎中布爾賽奔璽前往分編旗隊又請給
纛及請安進貢使人俱自肅州乘驛應如所請得旨依議纛用紅
有應報聞之事准十五人乘驛○壬子兵部理藩院會同三法司
奏思格色趙山前奉旨差一人於丹津鄂木布差二人於丹津阿

拉布坦告以噶爾丹之死且招與俱來乃思格色竟不到丹津鄂木布所但同趙山至丹津阿拉布坦處前行七日卽借稱糧騎告乏而歸明係違旨應立斬示眾得旨趙山至所指之地其事已竣著令歸家思格色竟不到所指之地著立斬○癸丑 上御瀛臺紫光閣閱武舉騎步射技勇擇繳煜章等十一人復令步射四次騎射二次 上又率善射侍衛等射 上發五矢皆中諭大學士等今科落卷武舉人內安知無騎射俱佳而被遺斥者乎如其回籍則已若有留此者令兵部察明復試○甲寅賜繳煜章等一百一人武進士及第出身有差○乙卯理藩院奏厄魯特丹津鄂木布使彭楚克車臣白克阿兒達爾鄂木布奏稱欲往策妄阿喇布坦處但丹津鄂木布向與策妄阿喇布坦不合應遣人招之使來此奏未可憑信 上允之差羅卜臧丹巴齋敕前往敕曰朕前聞

爾與噶爾丹分拆游行故差合色馬尼圖捧敕諭以來降必使富貴優加恩養爾如同丹津阿拉布坦往歸策妄阿喇布坦朕不究著明白覆奏如兩無所歸欲於額黑阿喇爾洪郭羅等處據險窺伏朕斷不容必剋期破之爾使人諾顏格隆臧布額爾克俄木布阿旺達什等來奏云儻噶爾丹至我近地我必擒而殺之歸降

聖朝又以敕書使諾顏格隆臧布齋去諭爾雖不能擒殺噶爾丹而身率屬下來降亦必使之富貴優養之毋疑毋阻今爾竟不往歸策妄阿喇布坦仍另自游行豈因爾向與策妄阿喇布坦不睦有歸噶爾丹之事故不便復歸策妄阿喇布坦乎今噶爾丹身死國亡生擒其子塞卜騰巴爾珠爾又擒伊拉古克三胡土克圖今爾不速來漸至日久則爾生計亦漸迫若爾率屬下星速來降朕必加以厚恩優待愛養目下丹濟拉車陵等來降俱使得所而愛

養之爾亦當聞之詳矣今軫念爾無所歸生計窘迫欲使得所之意爾當籌之速來歸降毋貽後悔爲此特遣爾幼時服役識認之人羅卜臧丹巴齋敕往諭○丁巳理藩院奏厄魯特巴圖爾額爾克濟農應授何職於何處住牧得旨巴圖爾額爾克濟農授以貝勒另爲一扎薩克給與印信約束其屬下人丁編佐領住賀蘭山○戊午理藩院奏丹津阿拉布坦奏合色等奉差齎到敕書內令臣當兄弟同居臣原欲卽往與之游牧因臣妻大病今年不能親身往覲不論所居何地總之請 聖安進貢者也查丹津阿拉布坦原與策妄阿喇布坦不睦下人無食窮無所歸應遣使招來上允行仍命其使人諾顏格隆臧布達什俄木布齋敕而往敕曰朕前降敕諭爾來降今觀爾奏言尙在首鼠兩端凡來降人員盡皆恩養使得其所爾當深思之作速來降爲此卽遣爾使人諾顏

格隆臧布達什俄布齋敕往諭○左副都御史扎賴以病乞休允之○庚申調覺羅三寶爲兵部右侍郎以孟額爲刑部右侍郎

庶子

○辛酉諭大學士等翰林院詹事府內滿洲官有自各部院

以才能升授者自後凡有差遣及審讞之事亦宜遣往朕觀翰林院滿洲漢軍進士出身者所學俱優若有差遣時可除正差之外於伊等內著一員同往練習○壬戌諭戶部比年出師討寇總爲中外生民永圖休息故不憚勞苦遠歷邊塞其一切飛芻輓粟皆動支正供額賦不使累及閭閻獨是大兵牧養馬匹及三次師行出入皆經山西地方緣邊州縣衛所固屬勉力急公其餘郡縣雖非師旅所經亦有協辦轉輸行齋居送之事且該省歲屢不登穀價翔貴民間生計甚屬艱難朕乘輿頻臨目所親覩者軫念殷切未嘗一日釋懷昨歲曾有諭旨俟噶爾丹殄滅之後誕敷德澤今

寇氛蕩滌邊境枚甯是宜格外加恩用綏黎庶康熙三十七年山西通省地丁銀米一概蠲免爾部移文該撫令徧飭所屬實心奉行○賜三次從軍官一級晉鎮國公蘇努固山貝子○以倫額特爲左副都御史由通政使遷○癸亥先是差工部侍郎常綬等齎敕往

諭策妄阿喇布坦至是還奏言六月十五日臣等至策妄阿喇布坦所授以敕書賜物謂之曰爾昔有擒斬噶爾丹之奏今噶爾丹雖死而丹濟拉乃同逆之人近至爾地爾當擒之並噶爾丹男女及體骨畀我伊拉古克三胡土克圖乃本朝人得罪逃歸噶爾丹凡百禍端皆此人興之亦當執之與我策妄阿喇布坦言丹濟拉已遁至中國不必言矣鍾齊海無知之女噶爾丹已灰之骨不便相付臣等再三索取竟不之與續執伊拉古克三胡土克圖其弟孟克里托博克噶爾丹之子車陵三魯卜其母察罕及程貝臧布

等交付臣等又達爾扎納親哈什哈之妻色梭達什訴於臣等曰
聖上使我與丈夫完聚故與吳爾占扎卜之母一齊發放今聞
丈夫自哈密擒解 御前乞帶我去與丈夫完聚臣等亦攜之而
來車陵三魯布在途出痘而死問伊拉古克三胡土克圖供曰負
皇恩罹此大罪我復何辭等語謹此奏明 上命議政大臣會
議尋議覆伊拉古克三胡土克圖孟克里托博克應凌遲處死程
貝臧布伊拉古克三胡土克圖之徒羅卜臧多爾濟應斬婦人布
林察罕交該部安置得旨伊拉古克三胡土克圖孟克里托博克
俱凌遲處死程貝臧布暫緩決有要言問之令取來羅卜臧多爾
濟隨其師行與彼無涉著免死餘如議議政大臣又奏先是侍衛
巴布希津木巴遇伊拉古克三胡土克圖劫掠之時托博克與皮
裘馬匹使巴布希等歸得旨問托博克果實則宥之尋解伊拉古

克三胡土克圖等到京集諸王以下蒙古王文武大臣官員喇嘛等於黃寺磔誅伊拉古克三胡土克圖孟克里托博克給巴布希等裘馬是實免其死○卹征厄魯特陣歿護軍騎兵予其子七品以下官無子者贍其家口終身單丁者給祭葬○戊辰 上謁陵啟鑾○庚午 上謁 暫安奉殿 孝陵至 仁孝皇后 孝昭皇后 孝懿皇后陵奠酒○甲戌刑部以太監劉進朝逃出訛詐讖罪奏聞 上曰劉進朝乃禁中役使之人逃出已屬可惡況又於所逃處嚇詐有司宜照光棍例議罪嗣後太監有與同罪者以此爲例○乙亥理藩院奏喀爾喀故貝子阿南大之妻雖欲將貝子與其第三子丹金承襲但其長子滾楮克又經具呈相應請旨 上曰蒙古人欲各爲扎薩克不相統屬朕意伊弟若各自管轄愈善昔 太祖 太宗時招徠蒙古隨得隨卽分旗分佐領封

爲扎薩克各有所統是以至今安輯宜如阿南大之妻所請令其第三子承襲貝子其長子滾楮克儻欲另爲扎薩克亦可封之○是月免江南海州等二十一州縣衛水災額賦

十一月辛巳 上還京師○甲申兵部議敘督運大臣于成龍等加四級三路運米墊道官員分四等議敘得旨于成龍授拜他喇布勒哈番塞赫復副都統職布雅努以侍郎用餘依議○丙戌諭戶部朕頃謁 陵時見用小錢者甚眾所換之數亦多舊錢及兩局之錢使用者少此實非益民之事也今歲田禾大有而米價仍貴詢之士人皆云錢賤所以米貴又問小錢從何而來皆云山東來者多由此觀之自古以錢法爲難誠然先年科爾坤佛倫管錢法時奏請將錢式改小朕每謂錢改小易改大難錢價若賤則諸物騰貴後因奏請再三方始准行今果如朕言爾等卽同九卿將

錢法如何方能盡善確議具奏○諭大學士等嗣後凡遇行兵以武官委署戶部兵部總尉之例著永行停止可將二部司官特行派遣戰勝敘功之時伊等不得與如此則伊等即可作明證諸事自從公料理將此交與該部著爲定例爾等亦記之○封下嫁喀爾喀多羅郡王敦多布多爾濟之公主爲和碩恪靖公主○戊子諭大學士等凡關人命事朕再三詳閱務期平允昨見高陽縣盜案情有可疑特差司官覆審今據奏張三等果非眞盜嚴刑誣坐希圖銷案沈朝聘竟不詳察草率完結定罪具奏殊屬不合著三法司會同吏部議處○癸巳京師地震○甲午諭大學士九卿等朕自臨御以來早夜孜孜以敬天勤民爲念不敢少有逸豫偶遇災變則尤悚然靡甯今次地震朕心不勝兢惕方今外寇初平海宇無事而災變示儆不可不加修省朕披覽前史如漢之文

景宋之仁宗亦有此異因其克修人事遂獲長享太平其他遇災不做視爲適然卒致衰替可爲炯戒每見內外大小官員多圖暇逸怠於職業能實體朕懷留心民事者甚少茲宜加殫乃忱共勤實政以爲修弭之道一切政事有應興應革者爾等可悉心講求集議具奏○安南國王黎維正奏臣國牛羊蝴蝶普園等三處爲鄰界土司侵占請敕地方官給還時雲南巡撫石文晟來京陛見上問以安南邊境事石文晟奏曰牛羊蝴蝶普園等三處明時內屬自我朝開闢雲南卽在蒙自縣徵糧至康熙五年改歸開化府屬已三十餘年並非安南之地伊輕聽妄言擅行具奏而又遣兵到邊是時臣同督臣仰體 皇上柔遠至意令防守人等不得輕動臣思此地久入版圖且在內境斷不宜給還 上命大學士等詳議尋議安南國王黎維正不察本末輕聽妄言遣兵於邊疆

駐紮生事妄行應行文申飭從之○戊戌禮部議覆朝鮮國王李焯奏請於中江地方貿易米糧應不准行得旨朕撫馭天下內外視同一體並無區別朝鮮國王世守東藩盡職奉貢克效敬慎今聞連歲荒歉百姓艱食朕心深爲憫惻彼既請糴以救凶荒見今盛京積貯甚多著照該國王所請於中江地方令其貿易○諭大學士等浙江巡撫線一信居官甚劣著革職○辛丑以張勗爲浙江巡撫由山東布政使遷○刑部右侍郎孟額以病乞休允之○以囊吉里爲山西按察使原任甘肅按察使○癸卯 上御保和殿青海扎什巴圖爾台吉土謝圖戴青那木扎爾額爾德尼台吉益楚克台吉等來朝行禮畢命喇嘛商南多爾濟引近 御座前 上諭扎什巴圖爾曰爾父顧實汗自 太宗文皇帝至今進貢請安輸誠已久今至爾身往來不絕朕至甯夏時遣大臣等至爾處爾等卽欲來

陛見朕又恐天暑爾等未便故云俟秋涼時來朝爾已年高遠涉至此殊可嘉尙又諭朕並非威懾爾等前來不過欲令天下生靈各得其所朕之尊不在爾等之來否所望爾等各遂安全克副朕好生之至意耳隨賜數珠袍袿銀幣鞍馬有差○甲辰諭大學士等各省被災地方巡撫先行奏聞俟部覆之後始行察勘被災分數直隸山東近地猶可若遠省則往返奏請爲時旣久雖議蠲賑於民無及嗣後有被災宜報者卽將分數一併察報該部亦一併議覆○丙午以戴都里爲刑部右侍郎調壽甯爲副都御史

由內閣學

士調○是月免安徽泗州等四州縣水災額賦有差

十二月己酉諭大學士等近見學士甚不逮前席爾登黃茂啟奏折本不能明晰俱解任著隨旗對品調用○辛亥以劉煦爲山東布政使

由候補按察使遷

○甲寅諭大學士等朕屢次出兵看來爲將誠

難一應軍務惟在相機而行固不可急亦不可緩如阿喇尼紀爾他布過於急而爲賊所敗馬思喀等又過於緩而致伊拉古克三胡土克圖逃脫去年中路出兵時雖以眾論俟大將軍公費揚古然以此爲至論亦屬不可彼時公費揚古於五月十三日若不到昭莫多則噶爾丹豈不逃脫乎故爲將者必相機調遣方能濟事其餘庸流則多有失策矣○乙卯論追伊拉古克三胡土克圖將士違律罪將軍馬思喀以下貶謫有差○丙辰以辛寶錢齊保溫達俱爲內閣學士辛寶由光祿寺卿錢齊保由內閣侍讀學士溫保由詹捕右理事官遷○辛酉上幸南苑行圍○乙丑甘肅巡撫喀拜奏甘肅五學士子自設科以來從未中式一人請將涼甘等十學另編字號取中從之○兵部遵諭再行議敘湖灘河朔等三路設站人員上曰噶爾圖等俱係廢官伊等尙令復職而見任官員情願效力設站自去冬以

至於今尙未更換勞苦殊甚部議僅爲加級未當又諭朕凡事惟從公耳彼西路武官將伊等功勞訴於大將軍咨部于成龍亦爲運米之人言至此輩並無有爲之言者朕若不言誰復爲此輩言也誠以效力而論則此輩亦甚效力矣准其以應升之缺先用今軍務已竣著將諸人俱撤回○庚午 上大閱於玉泉山○辛未

上還宮○是月免直隸霸州江南山陽江西星子等三十四州縣被災額賦有差○是歲朝鮮琉球安南入貢○人丁戶口二千二百四十一萬六千八百八十二田地山蕩畦地五百九十八萬六千六十八頃三十四畝有奇徵銀二千七百三十九萬七千六百三十八兩有奇米豆麥六百九十六萬八千四百五十二石有奇草二百八萬一千六百三十五束茶十五萬七千四百五十三引行鹽四百三十一萬九千三百八十引徵課銀二百六十九萬三百

東華錄

康熙六十

三

八十二兩有奇鑄錢二萬三千八百六萬三千六十有奇